

四庫全書

集部

欽定四庫全書

集部

曹文貞公詩集卷

一至五

詳校官中書臣羅錦森

侍讀臣孫球覆勘

總校官進士臣朱鈐

校對官助教臣胡子襄

謄錄監生臣朱上林

欽定四庫全書

集部五

曹文貞公詩集

別集類四元

提要

臣等謹案曹文貞公詩集十卷後錄一卷元
曹伯啓撰伯啓字士開碭山人至元中薦除
冀州教授天歷初官至陝西諸道行臺御史
中丞卒謚文貞是集一名漢泉漫藁後有至
元戊寅吳全節跋稱為其子江南諸道行臺

管勾復亨所類次國子生胡益編為十卷又稱有張夢臣歐陽原功蘇伯修呂仲實四序此本皆不載總目於四序之前又列有御史臺咨文太常博士謚議亦皆有錄無書蓋傳寫佚之後錄一卷為曹鑑奉勅所撰碑及像贊祭文哀詞挽章而目中提調校刊謄寫姓名一條亦未載入則後人刪之也伯啓生於宋末元初而家世江北不染江湖末派亦不

沿豫章餘波所作乃多近元祐格惟五言古
詩頗嫌冗沓其餘皆舂容嫺雅颯颯乎和平
之音雖不能與虞楊范揭角立爭雄而直抒
胸臆自諧宮徵要亦不失為中原雅調矣乾
隆四十六年十月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

曾文貞公詩集卷一

元 曹伯啓 撰

五言古詩

憲使徐公子方俾諸生賦勤學詩蓋示勉勵之意

偕題卷末

脩身戒昏惰學業貴精勤聖人惜寸晷志士耻無聞勤
惰不自省賢愚此中分流觀八紘內矻矻窮朝曠農者

國之本三時務耕耘作勞乃有得老稚俱歡欣梓匠服
工役營營操斧斤商旅涉險阻衷情若煖焚中年致豐
富築室連青雲士也責尤重凡流豈同羣綱常繼絕學
仁義匡時君聖道苟不熟幾何能策勳昇平古來少幸
際書同文發憤簡師友勵精攻典墳螢雪代膏蠟藿鹽
鄙臙董衡門拒遊宴世慮祛絲棼涵養至成德功名奚
足云繡衣來何莫文幟張吾軍敦勸果無怠英材見紛

紘

學宮雨夜有感

北風撼庭柯寒雨擊簷瓦恍疑更漏急俄頃恣飄洒輾
轉宦遊客聽此殊不雅留滯三月餘憧憧若奔馬緬惟
莘郊人清芬播中夏徵車再三來囂囂尚耕野以身閱
盛衰動靜非苟且竹帛照古今惠夷同聖者人材有徑
庭理勢遂高下負此頑鈍資辛勤願陶冶茹糗充朝飢
芹宮比餘厦僮僕夜號寒私憂若爲寯鼎食愧臧獲陸
沉哀屈賈載詠鷄鳴詩行箴隨用舍

相馬圖呈杜勉齋左司

造物出萬類貴賤伊誰分圭璋雜瓦礫世道同踈親既
收大宛種一掃駑駘羣乃觀相馬圖低首先吟呻千金
購死骨舉國無其真生世何太晚鹽車負艱辛悠悠虞
阪道赤日煎紅塵行人亦何多具眼惟孫君一顧不旋
踵價超連城珍誰為繪此象庸示將來人相馬失之瘦
相士失之貧於茲有鉅公數載居沉淪涵養浩然氣輪
蹄任紛紜素識太平象鸚表飛青雲紫泥日邊下八座

生陽春攄心握文柄引年啓賢門凝睇辨臧否立志安
斯民他時了經濟丹青畫麒麟回顧相馬者細務何足
云寥寥載千古二道非同倫相士今何人少陵身後身

題趙治中詩卷

聖德混遐荒天戈指江左簪笏或山林猖狂盡逋播久
萃南海涯生靈寢凶禍元戎運良籌分使選剛果趙卿
掉臂行咸謂蟲赴火開諭皆來臣旄頭應時墮省檄守
循陽報效何么麼挂冠梅花峯誰復論軻當其徇國

時豈識身為我所幸吾民安貴賤無不可徜徉湖海間
酒剩糧不裹同沐恩波深何必近青瑣回視窺祿人擾
擾真螺贏悠哉復悠哉銅柱暎蓬顆

官馬行呈李總管

肩輿坐尤穩官事倦逢迎南來祇乘馬僕隸教編氓洗
則養神駿秣之愛長鳴四時腓且安主人心始平翻思
歷茲郡牧民爲正名科徭思日寢刑罰願時清胡為政
多門青紫亂縱橫訟言無巨細案牘竟紛爭鬻田給征

稅伐木空原瑩民心無正歸歌謠有新聲服勞於王事
孰憚夜與明徵求苦煩急日用何由生爭如作官馬蒙
背銀鞍輕吾儕聞此風鬱鬱傷中情不有治安策自慚
非國楨歌詩贈官長敢效舂陵行

題江寧李襄公畫槐手卷

襄公五男子耕也官最卑三兄歷朝班雍容老相期庭
槐公所植一幹生五枝次四獨秀發耕乃適榮滋當身
耀金紫喜氣充門楣造物補不足雲仍受繁禧乃悟窮

則變乃知盈則虧未來氣已形既著人方知向非陰有感草木終奚為天理未嘗息天君毋自欺寄言聲利徒種德宜孳孳

題胡府判趙生山水卷

畫名無言詩所貴存天和包含物之理方外手可摩趙君圖畫手前輩誠無多吳縑二三尺意馬揮干戈畫水有清意涼風皺微波畫山無著色岱宗夫如何浮圖寺之表舴艋巖之阿披圖一回首逸興高寒我紛紛名利

人塵土雙鬢皓我亦在其間歲月空蹉跎林泉有餘興
從此歸漁蓑

和完顏正甫僉事見寄

芸芸天壤間物物自終始陰陽司屈伸雨露發膏泚窮
探造化妙學道當沒齒憶昨效前脩老屋坐荒址誠能
不汝畫么麼變竒偉華髮已侵尋蘭臺方小史補報無
尺寸追思負甘旨胡為俗累深不得宦情已涉世相推
移因人具條理堂堂顏使君端為蒼生起東甌素凋瘵

宿弊要全洗守宰如星分妖紅連俗紫已聽下車謠清
強新直指巖巖金華峰湛湛穀溪水吾道增光輝霽景
照紈綺古今誰並駕避路行且止簿書日奔忙愧我徒
為耳

寄謝陸義齋廉使諸公

崢嶸古暨陽事簡風俗淳僕也一何有忝為幕中賓齊
瓜六見熟于今作閒身東臯事游息聯鑣出城闈時當
仲夏初萬木繁陰新眺覽悉幽勝主賓若同寅雲間陸

公子丰姿邁羣倫妙齡心老大富貴不驕人石居狀元
後累葉為縉紳海翁文章伯子弟盡麒麟何有兩夫子
家聲德相隣行樂興非淺杯盤夜及晨名園開錦繡品
饌羅竒珍晚入清涼界諸公禮極臻於菟亦無懼酒力
乃爾神處士葉其姓綠綺隨烏巾時聞操一曲天地還
氤氲歌調間南北手談弃踈親黃雲徧四野遐邇不憂
貧凝睇即成趣滿懷俱是春主人捧觴勸厭飫難為嗔
斜日覓歸路曹騰入囂塵夢覺思梗槩擁鼻如酸辛倦

倦無以報作詩記天真

和傅荏山九日秋闈

宦遊何所得歲歲客殊方馳騫不自已別離是尋常
資身素無策遐愧工與商光景一行速瞥然度飛黃瀛州
良不惡復到澄清堂借問堂中人生平有何長夢想粉
榆社披襟坐藜牀晦息存夜氣晨興玩天光云胡不歸
去老大徒悲傷秋雨忽開霽乾坤變清涼偶於職守外
沿檄監文場諸生競葩藻寸晷何倉皇藩臣喜揚激寶

筵秩觥觴秋陽暖慈闈春風遊帝鄉
餅中有紅腐穩博
大官羊

戲贈曾鸞舉

古人重名節世好奚足云傾蓋一相得固無猶與薰吾
子號竒特積慶久已聞浹旬侍清宴丰姿靄御雲簿書
不濡宿凡羽徒繽紛席第承几案讀書類能文蹇余一
月幸薦剡煩運斤同姓道不殊中心日欣欣空期九仞山
一簣庸加勲誠慮太阿病倒持貽誚君可憐為親者茹

糗窮朝曠雨驟風亦馳靈臺若煖焚詩書養平昔饕餮
非同羣容我多士間獻誠只心芹孔兄正羞澁赳赳色
氤氳曾丘筆有口顧足騰清芬胡爾回文後莠辭致難
耘或無復或有鈞例孰能分主將肅戎幕校徒調三軍
茲情試常紀長者心無熏

澣衣圖

靜女思歸寧澣衣拜高堂隱士履貞固濯纓視滄浪苟
有涓潔心顛賴猶姪姜常懷濟時策進退皆康莊

濟州登太白樓懷鄭從之御史二首

高城蘸雲根聊可慰心跡
長風萬里來如對騎鯨客
監州好事者樹此樓與石
隆鼻號金仙更長謾嗟惜

堂堂鄭使君美譽粲星文
不羨草頭露願栖山上雲
磬

躬事女冠無乃承異聞
賤子抱負淺仙凡未能分

鄭弁
官師

女士號
髮冠者

雨花臺獨步

燕薊走江浙洋洋夸此臺
金仙入幽夢真能易凡胎
徒

步良自苦行行益紆迴前人重出處納履心悠哉

觀朱張二府

相府劇深邃將壇勢崔嵬古今爭不已十去久不回所以陶靖節東籬只銜杯我輩何足道青山好歸來

張菊存精舍讀克明樵隱佳什附詩於後

邊庭析骸斃伐輻住雲山斤斧既適用雙肩敢辭難世事如棋局靜觀不知還夜深一爐火莫遣兒號寒

蕭縣道中早行

行行古天塹，幕幕桑與梓。樹枝防刺人，天明僅十里。切
名果何物白，髮仍早起賴。聞瀑水聲清，徹畸人耳。

贈江夏相者陳梅心

江滸老梅樹，百花頭上開。微風散清馥，寂感如靈臺。君
子道云長，坐觀凡木摧。莫辭方寸苦，調鼎鑑英材。

曹文貞公詩集卷一

欽定四庫全書

曹文貞公詩集卷二

元 曹伯啓 撰

七言古詩

休日陪漢陽諸名公登秋興亭觴詠移時塵慮頓
息但以不得會仲通為歎因綴長句呈欽夫僉司
士元太守君平察推仲通宰公暨座中諸友

散材生世元無堪強持陋質偕梗楠年餘耳順雪垂領

誤承任使來江南公庭日午了官事西州散步成竒探
歲寒亭樹發秋興名公齒序相朝參鴛鴦梅梢欲落蕾
鳳凰山頂飛晴嵐江水朝宗淨拖練湖光照影清揉藍
旅鴈書空度荆楚浮雲護日橫湘潭蒼茫宇宙一俯仰
形役道路何癡憇移尊偉觀排小酌紫霞潑灑堆紅柑
人生擾擾有今日座客云云無俗談長安富兒不識字
但能几案羅肥甘眼中梵刹如比櫛焉知曉事無瞿曇
知音更有驄馬客威稜坐可懲奸貪山邊聖人惡旨酒

禹廟在側故云望之不敢成醺酣一襟清興豈終極催歸黃帽

牽羸駭漁歌悠揚風色暝人影散亂波光涵船開棹進
一迴顧匆匆到王公菴

登君山迷懷次史同知韻

史闕 祥字闕 與名儒 史繩祖學齋之子眉山

人自號葯房

後居三衢

大禹神功孰可擬萬水道之歸一派滔滔江漢爲朝宗
分破坤輿爲兩界朝烟暮靄難具言一得憑觀即踈快
堂堂史倅文章伯聲若洪濤動澎湃登山臨水悼興亡

詩句瑰奇韻尤恠當時未能陪杖屨想像風流儘堪畫
古今亦自重歡笑醉摘頭巾花樹掛蓉城酒美風俗淳
綠橘霏微散香灑天南地北江城客從此好償安樂債
翻思巨猾舊相隣心跡無聊時作噫區區刀筆何足論
自負魏峨益豪邁一方弗克知偽謬二載何嘗得真話
巖廊步武皆若人健王忽聞誅毒蠱融融間里發新歡
回首茫然事幾敗鵲來鳩去巢復完急雨斜風任飄灑
水邊興感遽多情還笑書生性常隘

題趙鼎之一山詩卷

君山蒼蒼矗林杪萬古蓉城爲高表大江橫絕聲喧阗
浮世紛紛幾昏曉南崖地勢抱靈秀崧嶽生申此生趙
孟鑄其名字鼎之特號一山歸興杳春申當年富公子
漫與此山期不天只今誰主復誰賓眼底千山萬山小
山英動色如有情鍾秀茲人尚年少早圖勲業汗青編
千載東吳青未了

陪諸公杖屨登梁王吹臺悠悠悼古之情不能自

已呈孟子周子文二友

天宇廓然秋已暮幽人欲作登高賦
聯沽酒上繁臺
千古興亡一回顧百鳥喧啾塔半摧
荆榛掩映臺前路
黃花采采未成歡目斷荒城起烟霧

送申仲禮言別還第

世間去就崇口給君子知幾不終日
申卿掉臂挽不留
臺閣諸賢悵如失不爲分携淚沾臆
但傷直道人難立
相如有才徒四壁心事還同家事急
輕舟蕩漾吳楚路

坎止流行須自惜，妙齡未許作閒身。會有重尋董狐筆，
餞王景先僉司赴燕南。

河朔名藩尊趙郡，刺史開司冠諸鎮。太行形勢控幽并，
輦出衣冠跂廉蔭。衰榮代謝苦不常，屢值天公降饑饉。
繁華唯得夢中看，毗庶流離棄忠信。蘭臺極念濟此邦，
繡斧多方簡豪俊。真材適見王吏部，攬轡登車氣逾振。
焦禾待雨報秋成，貪吏聞風應解印。賢臣生世責非輕，
莫使秋霜空染鬢。

贈相者高心月

心涵衆理常虛明，烟如素月流青冥。
掃除靈臺掛秋鑑，天下妍媸無遁形。
區區老境事奔走，汎汎人海風中萍。
便從心月問前路，形車氣馬何時寧。

讀約齋段侯詩卷

少年馳驟清淮甸，復領牙兵洗江練。
車書混一論疇功，驚看浮雲日千變。
賣却寶刀歸紫燕，拄杖支頤笑顏面。
寂寂柴桑不見人，黃塵埋却金閨彥。

贈相者梅山

元氣淋漓生萬物莫悴朝榮自飄忽梅山老子究此心
道眼相人惟相骨昔年貴重葯房公果見青春照簪笏
疇昔聞子否已傾夢魂遠逐秋天鷗

夜宿太湖岸

太湖西望如滄溟木落霜寒波更清聞道是中多巧石
明朝豈用勞生靈晚風作惡蛟鼉走搖蕩乾坤洗星斗
大隱乘舟不見人而今盜賊爲淵藪

贈陳方回伯仲詩

并序

洛下古都會河山潤秀人材瑰偉非中原他郡
所擬有附庸曰登封儒生陳方回寔生是邑世
守素業學務真淳以其係名兵籍躬戍東澗萬
夫長而下嘗賓師之尋致終代薄言旋歸方游
覽吳楚間秦郵主者貢爲淮東憲史參署有日
適仲氏方貢者收書亦南來遇諸江都怡怡旣
久從容相與言比年所生垂老家事屢空與其

東身抱牘營營乎寸尺之進曷若著斑衣奉菽
水溫故知新之樂之爲愈也輕舟短棹幡然偕
行就道之際凡我同盟是其義榮其歸飛毫落
紙者不爲不多矣愚碌碌無堪僑居江滸亦嘉
陳氏兄弟咸有古人之志或出或處不負君親
想像漢賢陳仲弓之二子遙遙華胄其克肖焉
及近世卿大夫節齋緱山之後豈復無有乎爾
因贈數語庸識將來誰謂華高企其齊而二生

其勉旃

壯遊自古男兒事收拾英華貯曾次逢掖南來掛鐵衣
陳生不露經綸志白雲在眼忽思親春鴈同回期不賈
近裏工夫實有加它年肯肩揚州吏

送蔡季良

盛世官規量材職逢掖仍須肆刀筆猥予南北閱人多
彼此技能相得失江東復一季良出姓字相聞不相識
同事同星几研親得覘幹局無儔匹簡書袞袞笑談了

政事優優儒道飾忽驚奏最覲天庭萬里秋風動顏色
英雄不下兒女淚著脚雲衢先努力除書消息待春開
何處豺狼當屏跡

和趙鼎之中秋不見月

四事難并今古情春花已過秋月明秋氣平分月先滿
海風吹起雲縱橫萬戶千門心若崇簾幕低垂綠窓閉
洗盃小酌興茫然夜雨空階作秋意一杯一杯復一杯
浮雲於我何有哉至人胸中月常在燈前一笑雙眉開

四時月色皆圓潔祇是人心還自絕讀書意氣當拏雲
及此幽寒謗嗚咽和詩聊與節相酬旅思綿綿無盡頭
明月明年何處看神州相望更多愁

戲作村中謠呈吉甫提舉諸兄

江左頻年水爲厄廩庾枵然民菜色猥予分職古鷺州
材質踈庸謬籌畫苟循轍跡失公忠纔事徵求便煩刻
何如豐歉都未知日侍諸賢浮大白

送趙彥誠

宦遊憶昔留神京巖廊接武皆豪英相從既久知姓名
奮身半是齊東城東方山水鍾英靈人材濟濟懷忠貞
趙君家世居鄒平妙年曾次吞幽并昔從案牘嗟勞形
深衣幅巾務明經十年潛心今存誠蘭臺掾史奮鵬程
此來平獄期無刑况與冠玉聯鑣行發奸擣伏如神明
光芒文彩刃發硎矜看政績垂丹青天南地北蜚嘉聲
拂袖歸來心跡清華峰峨峨綉江澄齊魯相望莫寒盟
它年倒屣須相迎

贈卜者范心鑑

大造無窮如轉圜五行佐切隨變遷人生貴賤混賢否
繫乎氣稟純與偏世間談算不知數蘊奧相背徒紛然
豈期區區古澄川范子能聲爲衆傳試將猥命與評跋
大篇巨軸飛雲烟前途兀兀未敢知既往行藏如目前
陳說浮生皆默定乃知家世心爲鏡金谷繁華掃地空
渭濱釣叟師周政相者惟從骨肉尋經云積善當餘慶
躔徑雖殊指一歸予今萬事皆從命

送趙石居之官慶元

六年薄宦居申浦百技茫然性踈魯客舍公餘一事無
搢紳顧訪森如堵高山流水洗憂感黃卷青編閱今古
回首長安如斷蓬南雲翳翳生淒楚小舟俄載石居來
飯顆山頭逢杜甫鉉繫優游習氣同權門悵望丹心苦
綠陰初見盍朋簪倒指聯鑣踰夏五大火西流菊又殘
孤衾鏡冷聞雙杵一鳧今日忽南廂燦燦牙緋光鼻祖
新制興除務必行銓材歷歷皆良輔東南山水得竒探

人物瑰奇壯城府莫道臨民始有爲存心濟物非無補
猥予無計理歸裝滿面風埃猶噲伍身世由來祇自憐
愁懷此去憑誰語江城事簡俗亦淳彷彿居安勝鄉土
茂林脩竹鼎魁方皓月清風自賓主談笑四明官事了
時宜命駕瞻衡宇廟堂倚任今伊呂苟有寸長思一舉
同是悠悠萬古情它年許接朝天武

寄胡教諭六首

駕言江東秋已莫河洛先生欣所遇形容質朴千年松

學問淵源九經庫欲學毛生慰老親便携長策干當路
我今參透草鞋禪何似高門作書蠹

江臯迢遞風景莫游子倉皇悵無遇壯心激烈期軒昂
人困日長囚筦庫久坐應教靖節啜拚歸又怯長安路
何當著脚簿書藪刀筆猶能削奸蠹

跳丸苦欲催衰莫千里魯侯嗟不遇外臺飛檄譽廉平
底用琨瑒藏寶庫知非未敢做蘧瑗喜過尚堪師子路
悠悠天地亦何心輸與芸窓坐蟬蠹

遺經兀兀窮朝莫月窟天根有真遇何爲提要必鉤元
殆似立家須殿庫終期太史開旨聲肯效揚朱泣岐路
相逢袞袞勸時粧墻角禁拋書養靈

山禽似說歸何莫不學三餘思董遇渾金璞玉皆若人
翠羽丹砂已充庫從容受命是天真俯仰同流非正路
聞身未老治菟裘世事侵尋木生蠹

風雨愁城楚江莫前人豈盡非常遇懷材抱藝儲琅玕
擊柝守閤司庾庫襄王抵死負靈均子敬無心事公路

我曾奔走謬趨趨鑽紙篆科蠅友蠹

子方心困二隱君屢以書疏相問因伯亨都司赴
台亟聯數語寄謝

宦遊始至澄江日異代衣冠常接迹更見諸生列郡庠
大篇巨軸輝金壁別來三十四周星世事消磨如過客
區區耳順有五年坐覺羲娥急朝夕官債窮愁舊復新
茫然回首成今昔兩賢時得夢中看目力昏花心尚赤
送獨吉經歷遷內臺

麟鳳有名人不識一出端能瑞中國
拯焚濟溺非所長
君子同聲復同德單父鳴琴不忍欺
南陽召杜今猶憶
後來從政何紛紜丹鳳高竊麟就踣河山秀英散還聚
間世名賢出西北歲歲公朝作羽儀
昭昭相府乘衿式
剴裁不覺到襟宇予奪誰能動聲色
賜環消息九天來
拂我羣情亂如織臨岐一語還自釋
吳楚區區駐難得
廟堂新政待良籌行看八荒開壽域

乙卯清明沅州郊行

信馬沅江江上路，歷覽芳菲忘故步。
因逢古廟說前朝，忽見孤舟橫楚渡。
二難恨識十年遲，四美豈期今日具。
人生能得幾清明，莫對殘陽怨遲暮。

壽喬令

李白桃紅春律仲，熊羆一夕占佳夢。
松岳鍾英積善家，英材墮地真梁棟。
萬里雲途早致身，牙緋濟濟照青春。
當年東魯蝗踰境，此日南山虎避人。
此人善射玉樹芝蘭壽觴舉，使君喜色形眉宇。
賓朋雜遝輕裾飄，絲竹喧闐細

腰舞元戎家世負元勳
昨是今非且莫論
好約畫堂千古月
年年相伴醉黃昏

蔡茂先御史種德堂

人間種德如種樹
培植日久生輝光
吾儕未達感應理
直以風水縈肝腸
夫君善慶目所擊
聲譽赫奕家彌昌
要將成績示來裔
特書二字名高堂

哭子謙亨

曾子謙亨字光益
祖父文山移碭邑
宋金華裔居太丘

睢陽城東鄴城北父仕江陰實辛巳育汝今年二十二
六經文藝邁同倫孝弟純誠無不至東風吹起遠遊心
姑孰姚公如玉金擔簦就學千里去每對斜陽思好音
壬申中秋短三日東道張卿遞書尺爲言卧疾求良醫
汝兄走視星火急我持省檄在雲間汝兄俄自姑孰還
乃言音書之來翌日爲鬼錄使我相對號慟生意俱摧
殘世間子女人皆惜亦有珠瑰雜瓦礫創然碎却千金
壁地久天長淚霑臆陋棺風雨寄江東日夜音容在眼

中大鈞播物極萬變悠悠此意誰能窮謙亨稍解先天
理晝夜猶爲一生死英靈不泯聞此哀肯爲馮依訴終
始

曹文貞公詩集卷二

欽定四庫全書

曾文貞公詩集卷三

元 曾伯啓 撰

五言長律

陪翟沈二文學歲莫登宴嬉臺

一雨開新霽長空絕點埃
眼明初出郭心遠乍登臺
矮塔培黃壤推碑漬綠苔
幾人遮日去雙燕受風迴
稚柳沿新塹神祠暎古堆
翠峰依舊好金菊爲誰開
日夕牛

羊下天寒鳥雀哀黃流隨去住元氣接周回風箒誰操
執雲衣自剪裁松杉誠異質樗櫟謬多材傲北衣冠變
平南士卒來功名殊未已伏臘迭相催弔古情何益哦
詩愧不才歸歟風景暮携友且銜杯

因飲張氏
席上故云

秋夜西齋有感

旅况隨秋變淒淒百感生白雲凝望眼黃鵠計歸程
籃縷臨邛服藿鹽漂母羹舊病雖有瘥新業竟何成財匱
交情淡門卑禮意誠淹留諳世態出入論家聲眉鎖將

詩解心田仗筆耕，尊鱸張子興燈火。退之檠雨積堪與，
暗霜欺枕簟。清天風篩竹響，蒼溜瀉階鳴。伏翼生憐暗，
飛蛾死趁明。鴈鳴如有訴，蟲語不知名。兀兀心猶醉，
栖夢亦驚隣。砧催薄莫樓鼓辦，深更目斷家何在。年衰
志未平，自憐飄泊久。坐起若爲情。

送南冠謝時清北行

否泰今猶昔，兼攻弱遜強。天兵多奮迅，隣國半凋傷。士
馬仍吳土，簪裾躡漢疆。紛紛行路客，落落謝家郎。淮楚

冰霜重幽燕道路長負包躬若罄逐伴汗如漿載贄干
當路懷書謁尚方形神雖落魄意氣自昂藏傾蓋成三
益論文盡數觴貧中覘大節言外挹餘芳彼美文章士
來遊禮義鄉當途有知己無使嘆垂囊

和陳愛山

拉友尋佳致迢迢遠市喧度山寧惜馬傍水得觀猿淨
盡羈人恨招回遠客魂樹頭參漢表石齒漱雲根植柳
人如在唵梅墓亦存風杉蒼晚節雨徑綠秋痕數畝栖

霞洞千年落照村誰憐丞相宅我愛故人樽
叱道僧歸寺還家僕候門賈留真有意誰可代晨昏

再和

酷愛西山景經年可避喧一聲何處鳥百樣此中獲地
雅僧成趣峰高客斷魂長藤梯藉力茂樹石粘根賤子
心君駭賢人手澤存水亭寒有素雲洞秀無痕古篆紆
清澗新圖掛遠村乾坤雙斷梗身世一芳樽戍角催歸
路吟鞭懶入門五年申浦住卜宅愧吾昏

贈李都事

字和卿
大名

記識英豪士求官萃古燕
下風俄獲侍教雨屢蒙宣
老筆千人敵芳名萬口傳
心聲無悔後仁政足光前
柱礎尋常定盤珠左右圓
料量明若筮安止泊如禪
藩鎮麒麟布蘭臺鴻鴈聯
佩符臨此地彈指憶當年
流水供迎送飛雲體變遷
及瓜留未得行李尚蕭然
酌酒爲裝贐吟詩當祖筵
它時隔霄壤晚進望陶甄

謬成寄朱伯海主簿

聖朝覃至化寒士忝微官迢遞踰千里間闕歷萬端山
城居寂寞燈火憶團圞申浦烟塵暗君峰草木寒吳風
純已散楚語辨應難賴有朱夫子論文釋永嘆

五言律詩

敬題仁廟御筆加郭西塾等官手卷

宸心寄宸翰天語授天官際遇升騰易懷思補報難祥
雲橫碧落綵鳳出金鑾何啻千鈞重當爲百世看

和宮教授二首

蒲柳驚秋至，薰葭泣露漚。虛名無實用，旅迹寄遐荒。念
念歸南畝，悠悠夢北堂。緬思忠與孝，馬腹值鞭長。

青雲有高士，捷給如飛黃。白眼空四海，清風扇八荒。蹇
予誠跛鱉，世事付亡羊。客窓誦佳句，黃妳潤枯腸。

和人遊蔣山二首

爲憐山翠律，不避路縈迴。况值八九月，那無三兩杯。人
生行樂耳，世事已焉哉。碌碌剡溪令，何如終草萊。

古人追樂事，日費百千回。發興排詩律，消愁仗酒杯。何

時能做此吾道付悠哉所恨虧甘旨斑衣愧老萊

初到江陰寄徐路教仲祥五首

自古江南地澄江小翠微
訟清衙散早路僻客來稀
季子高風在春申故宅非
晚涼無一事携酒坐苔磯

自古江南地林泉勝槩多
扁舟波瀲艷羸馬路陂陀
異服人爭笑吳鄉語漸訛
茲遊諒竒絕奈得倚門何

自古江南地民安樂竄深
稻畦雲漠漠松晚霧森森
鷺鴨喧池水雞豚憩竹林
小舟維古岸銷我利名心

自古江南地東南別一天樓臺紅燭底車馬翠園邊
預官曹貴難逢吏屬賢不圖爭腐鼠危坐看飛鳶

自古江南地茲行始識真傳云風土異尚念里閭親
綠水羞前列斑衣負此身何如徐孺子詩酒四時春

和通州王總管二首

彼美王夫子相逢各異鄉秋高風淅淅江闊水茫茫
回首關山遠傷心道路長英豪休感慨十手指軒裳

霜信入譙樓人間溽暑收荒涼松菊徑潦倒芰荷洲
銀

漢誰家月金風滿地秋吟詩遇知己毛穎凜霜矛

村居

羨殺村居好經年絕是非牛羊歸晚徑雞犬散朝暉露
坐分藜榻郊行解葛衣城居苦踈隘來此卽忘歸

馬上倚和毛潛夫校書見贈

哀悰思故友携酒特相尋忽忽二年別悠悠千古心詩
書清畫永桑柘綠雲深羨子閒居樂無勞歎陸沉

宿呂梁寄子素府教

舟泊呂梁下心馳天地間澹烟新店舍斜月舊河山苦
債無終極衰年度險艱夢中孫與子相戒製編爛

和徐同知遊北山寺

重陽尋勝槩出郭抵雲山梵宇棲遲外田家指顧間人
言生處樂我羨此中閒景行東籬下螺杯且駐顏

蘭溪郊行

千里飄零客雙親喜懼年馬嘶青嶂外人望白雲邊要
領知誰授舒徐頗自便此行羞伏櫪何必較夔竑

和完顏東臯司

一踏荆榛路三經祀菊秋
下喬知有命行變覺無憂
素髮迎新歲青雲憶舊遊
詩來慰惆悵飛夢海邊州

儀山寄山東張希孟學士

有客樂幽閒棲遲濟岱間
昔時錢若水今日謝東山
蚤避鳳麟網固辭鴛鴦班
忝予聯故友衰白始知還

周可山風鑑獨步江東別
幾三十年邂逅金陵寫

懷奉贈

白下有遺叟栖遲周可山立談千古意坐占一生閒淨
拭妍蚩鑑高標義利關逢君常自媿衰謝不知還

答南冠

朔方崇信義南渡寢浮誇土實國風厚大空文物嘉皇
天親有道元氣造中華萬事非人力含靈本一家

夏夜露坐二首

蕩蕩青冥闊漾漾白露寒鷺鳥啼木杪老兔出雲端坐
久同誰語吟成只自歎慰親應有日沿檄到長安

露坐夜如何村居即澗阿蒼烟噴素月碧落轉銀河病
抑詩情減愁添睡思多秋風庭樹響勳業愧蹉跎

冬夜書懷

土銼蛛絲冷顏垣鼠穴稀充腸惟脫粟蔽體乏新衣守
分人嗤拙懷安自覺非當年同舍友裘馬自輕肥

秋日嘉禾道中詠懷

旅况隨秋變閒情與世疎年將知命到祿及代耕餘濟
物無良策安心有聖書雲山千古意瞻望獨躊躇

題王龍驤舟師圖

問罪平吳土分兵自益州百年還入統一鎖謗橫流王
氣烟同熄侯封死亦羞畫師微意在固國有嘉猷

辛亥三月陪馬克脩治書謁天游孫真人方丈階
前牡丹盛開卮酒同玩座中范提點索詩

拉友尋佳致琳宮引興長服膺師酒聖拭目待花王逝
水年華急行雲世態忙無因駐清景春色又斜陽

和張受益二首

交契觀夷險高卑象梓橋世途逢躑躅心境失逍遙道
拙身焉用居安氣不驕燎原風正急誰爲辨蘭蕭

蚤歲遊東魯從師學步趨齏鹽三尺命行李一囊書往
事隨黃鵠空場繫白駒宦情都淨盡歌枕憶耕鋤

寄景梁御史

清朝恢制度臺閣任儒臣昔預聯鑣客今爲避路人拔
茅言在耳遷木句傷神奔走情無賴西風起問津

用除夕韻呈菊圃

已坐儒冠誤那能吏責禁世途脩且阻時事古猶今聞
葺除煩障剴明見陸沉喬松冰雪底一點歲寒心

寄友人

汲古人傳僻安貧自覺清巨鰲誰可釣腐鼠不須爭未
了高軒過宜逢小吏輕白丁二十許甘學范高平

送祖繼先還真定

濟濟恒山客堂堂骨相竒書傳先世德文盡後人師進
退無非命功名不可期胸中長策在重看著鞭時

次韻王菊圃朋益相公二首

繡斧馳諸道，霜威霽兩間。
且評推剡粵，聲價等丘山。
帝德純無已，臣功敢置閒。
况非東晉日，何必賦知還。

元英貫心月，實理固靈根。
直節山侵漢，清流水抱村。
政聲隨歎乃，詩韻破人渾。
東魯多君子，名臣萃一門。
元遺山有

論人詩

悼幼子

世事雲千變，人生夢一場。
悠悠誰範冶，擾擾自彭殤。
公

道方緘口私憂敢置腸
家人能解此情淚莫沾裳

壽毛潛夫

西風吹晚節東魯毓英材
簡重由天性高明不露才
巖峙青壁凜凜助烏臺
四海黃花事百年長壽杯

送天錫省郎奉先柩歸葬宛丘

壯歲游南土方春賦北征
暫開千里足終復九霄程
存歿應無愧榮枯總若驚
堂堂公輔器休繫故園情

寄高文甫治書略寓自劾之意

憶昨分携地，忽忽暮月餘。年增心懶散，政靡術空踈。恨別幽蘭契，愁同乳虎居。新春將入手，歸計定何如。

用賈公儼韻壽何仲禮

當年遊薄宦，脫鞅到君家。摩拊紫荆樹，攀緣常棣華。芳名稱月旦，萍跡寄星槎。長壽鄉中客，陶然飲紫霞。

次鄭參政留別韻

鄭字信卿，平陽人，時爲遼陽行省參政，道過白霄。

塞垣巖嶮地，歲莫爲誰來。交態只如此，宦情何有哉。豈能供世用，聊復竭吾才。夜夜家山夢，羸驂幾日迴。

和宋御史喜雪見寄

都城久無雪臘日凍全消十月江南佳
六花簾外飄豐稜關政事喜樂到漁樵
拚向梅邊醉荒詩爲續貂

曹文貞公詩集卷三

欽定四庫全書

曹文貞公詩集卷四

元 曹伯啓 撰

七言律詩

詠鴈

寒色波光秋影涵
數行天宇到江南
銜蘆有爲防增繳
擇地無心入瘴嵐
寒暑相催猶可避
稻梁雖好不宜貪
哀鳴欲動何人意
獵騎彎弧酒正酣

夜雨

老屋淙淙榻屢移披衣起坐候晨鷄
四簷急溜三江瀉
一道寒聲萬弩齊飛電過窓開寶鑑
震雷鼓物揭征鼙
平明點檢人間事流水溶溶漲小溪

暮春用唐壽卿韻二首

一天晴碧日遲遲暑氣蒸人力自微
幽徑雨餘芳草合
小園風急亂花飛卧思沂上歌詩去
夢到山陰被襖歸
還憶去年乘小駿西湖遊罷北山圍

流水年華去不窮
眼看濃綠換芳叢
半溪淺碧春前雨
滿地殘紅午後風
客舍蕭條唯感物
壯心寂寞謾書空
吟詩羨殺唐公子
興在三山碧海東

就學東平嘉祥道中書事二首

行潦縈紆會古溪
一行白鳥自高低
敝裘恐惹途邊棘
疲馬愁顛雨後泥
思入石林風浩浩
吟成沙草日淒淒
相逢莫問經行地
萬壑千崖總是迷

夢回午枕倦聞聲
野鳥搏空隱見形
積水還同流水碧

遠山翻比近山青霞迎雜珮新荷燦風揭麻衣野菊馨
安得畫師頻點筆歸來移入紙方屏

夏夜露坐

露下晴空釀薄寒坤輿厚德載人寰星光遜月明珠碎
雲氣停風白練閒水鳥自搏空濶際烟蚊常在有無間
兒童爲數秋期近書劔無成益厚顏

送朱教之姑蘇二首

世變涇流雜渭波逸民今喜出烟蘿數間學舍三生分

一紙除書二載過韓愈有書思象闕鄭虔無路侍鸞坡
壯年莫作菟裘計事業人生不厭多

斗南名士浙東賓落紙雲烟字字新道出羲皇非傲物
學宗伊洛反疑人梗楠生世終爲貴詩禮傳家未屬貧
常記江城風雨夜短檠相對話情親

鄉飲禮罷次諸公韻

萬井笙簫宴畫屏桑田倏忽變滄溟十年人事成今古
數老天留載典型琴調既閒逢綠綺詞鋒已鈍出青萍

尺書上達文昌府藩邑區區尚禮經

看星

史文謀象闡精英世俗紛紛強指名太液淨涵棋局穩
姮娥圓繞貝珠清赤墀台輔幽人志蘭友參商此夜情
雷煥已亡誰繼踵劍光空射斗牛明

暮春登鶴臯書樓

官事源源無盡頭偶携佳友共登樓遊絲落絮春將盡
古是今非水自流閱歷人材溫史冊消磨塵慮索茶甌

南隣北里常相望莫厭貧交杖屨稠

夢酒詩會

身世年來憶哺糟華胥一夕藉薰陶半窓涼雨青綾薄
一片春風翠旆高烏蟻混遊槐國市綠醅初潑漢江濤
流鶯喚覺西軒底箕路分明指二豪

送丁仲謙赴都

器識薰涵太古淳笑談時露滿懷春自居中
文章士人道清時草澤臣千里關河猶是客
半生書劍不憂貧

舉頭似覺長安近會逐西風馬後塵

旬休日遣懷招陳德温飲

擁鼻南窓對晚陰自憐終日坐蕭森相如未遂題橋志
工部虛勞戀闕心儘辦赤心遭白眼聊將綵服照青衿
東隣况有陳驚座時得花前一盞簪

涇陽述懷

八月分司到縣
呈王仲瓊御史

晚境難期博望侯微官且學子長遊涇清渭濁源何異
物換星移志未酬隴月照人征鴈曉金天飛露候蟲秋

塵緣袞袞今猶古，唯有書生易白頭。

謝立齋惠蟠梅

寄來春色情猶重，讀罷新詩興轉嘉。
脉理貫通從詰曲，本根培植自英華。
三生清絕先羣品，一段芳馨異俗葩。
聞道南塘數株雪，更須騎馬到君家。

大名客舍

辭鄉彈指決旬過，謾擬長松帶女蘿。
僧室夢迴愁思冗，侯門食罷強顏多。
世途千里心如折，茅屋雙親鬢已皤。

富貴本來勤苦得不須彈鋏動高歌

賦愁諷楊初開同舍

硯沼依稀照敝袍
雕蟲誰製困英豪
支頤忽起鄉關恨
屈指難辭筆硯勞
眼底聖經渾已碎
階前兜輦尚相高
襟懷落落真無那
時自長吟寫鬱陶

子規

蜀魄曾為古帝王
千聲萬血送年芳
貪夫倦聽空低首
遠客初聞已斷腸
錦水春殘花似雨
楚天夢覺月如霜

催歸催得誰歸去唯有東郊農事忙

送濟南王秀才

青士名軒敏號齋主人風骨不凡材嗜書有味輕金幣
擇友無方至草萊衆口推尊循古道一篇騷雅露長才
遊仙既許從君去懷抱何時得好開

送翟慶之二首

書劍飄零二十年風流誰識玉堂仙柳營一顧膺新命
蘭室三生賦薄緣以道自居元有地若人空老是無天

功名遲速皆前定莫使蘇生坐馬羈

一昨荒城識鉅儒丰標高映月輪孤
笑談有味皆堪紀崖岸無形未可踰
商古訂今朝並几煮茶聯句夜圍爐
李侯聲價連城重他日先容肯作無

送人作宰

虎觀雍容出衆倫黑頭勲業耀鄉隣
曾聞蓮幕聲華美復受皇家雨露春
三載鳳鸞栖枳棘一朝騏驎出風塵
此行珍重青雲志邂逅相逢即故人

寄李總管

十載峨峨仰重名
荆州一識快生平
金閨通籍能忘勢
甕牖垂交亦盡誠
秋月共觀山北政
春雷同震斗南聲
龍門不少簪裾客
願逐朱轡上玉京

上李相

昔戴豸冠居漢北
今分虎節鎮山東
范滂素有澄清志
黃霸能施撫字功
數月謳歌聲藉藉
一時民物氣融融
姓名已覆金甌底
望決恩波及泮宮

詠懷寄趙君

鉛槧生涯二十秋，無依如鵲拙如鳩。
曾蟠子美千間厦，眼豁元龍百尺樓。
知命豈爭蕉底鹿，興宗要遠夢中牛。
壯懷磊落憑誰語，時問東陵謁故侯。

謬成

舉世紛紛日夜忙，閒中無意閱興亡。
千梳理髮驅煩熱，百編攻書備後忘。
屋角桑麻晴浪晚，門前榆柳午風涼。
人生未達須行樂，不待區區總郡章。

呈提刑

憲府聲名據上遊，綉衣駿馬出神州。
百城唾手分情偽，五聽存心訪戚休。
人物風流文勝錦，襟懷磊落氣橫秋。
從今海內歸公論，蓬筮真材少滯留。

喜雨

一雨如膏萬物新，亢陽無礙接冬春。
杯傳舊醪千村樂，隴出新青二麥勻。
請禱不煩投虎客，調元應賴問平人。
農翁未識天恩重，却費犧牲禮社神。

中夜偶成錄呈諸君子

桂玉關心坐寂寥不堪風雨助蕭條
人情瞥眼雲烟變俗事熬身歲月消
袞袞魚龍混滄海紛紛鴻鵠上丹霄
蘇秦行橐黃金盡夢裏神州去路遙

遣悶

人生出處判窮通不在兜曹臆度中
一劔崩緱貧作出六根虛白淨無功
從前狡獪今誰在到底繁華總屬空
親老家貧責非淺且留鵬翼待西風

祈雨罷。訪立齋南塘。用朱路教韻。

南塘幽雅異塵中。一道荷香水面風。適意未容兒輩覺。
開樽還喜故人同。醉來俯仰無今古。時至榮枯有變通。
此地無因駐清景。明朝憂旱欲成翁。

君山宴集用韓學正韻

時潘令在座

與客携壺上碧山。茫茫天宇一開顏。江濤洶湧懷思處。
民屋蕭條指顧間。落日照蓬趨水驛。清風拂座笑塵寰。
安仁解作閒居賦。栖鶻危巢也自攀。

座間復用鶴臯教授韻

東吳文族亞中州此日聯翩即勝遊
古剎突侵銀漢表好花疑在錦江頭
尊前醉倒俱休惜沙際春歸挽不留
後日重經行樂地一場佳話謾悠悠

謝朱鶴臯招飲

里巷浮沈適自由江城久住似菟裘
廣文活計貧無那好客情懷挽不留
滿院竹風吹酒面兩株榴火發詩愁
料應此日朋簪盍人物相看總上遊

曹文貞公詩集卷四

欽定四庫全書

曾文貞公詩集卷五

元 曾伯啓 撰

七言律詩

對月

東山素月何嬋娟
詩人愛此相留連
南北東西桂影直
三五二八清光圓
生魄死魄不二理
古人今人同一天
安得騎鯨李謫仙
吾欲對影沽十千

續滄江傅君平和善樂國王詩

五十六字盤中珠誦之如覲歐與蘇巨魚有時迷大壑
丹鳳無恙棲高梧憶昔簪盍漢陽樹至今夢繞郎官湖
雄章遠寄洗俗耳慰懷絕勝談虛無

良月九日夜與吉甫提舉宿王氏精舍風雨不寐
聞寄令弟潛夫同知佳章骨肉之情藹然具見令
人諷誦不已別後次韻寫懷

營營薄宦成何事雪點烏紗月照襟南北十年離別淚

田園一片去來心
衰楊岸口嗟興廢
逝水磯頭閱古今
濁酒未能澆磊砢
棹歌終夕伴長吟

府推史彥明遷安東太守次韻來詩寄賀

將謂投閒樂有餘
已聞丹誥送新除
灾祥自古由天降
忠直從來與世踈
治獄我慙于定國
濟時公類馬相如
太湖一阻三年別
淮水朝宗好寄書

和李彥謙御史

大鈞播物性難同
處世規模貴適中
分薄畸人偏得咎

時來豎子亦成功堂堂東魯青雲客碌碌西秦白髮翁
松栢相看期晚節肯隨桃李競春風

舟至常德出陸由辰抵沅書事三首

盤礴崎嶇力不任遐方風景變鳴禽舟浮湖面波瀾闊
馬憩山腰澗壑深千里曉烟炊紫葛一春寒霧鎖青林
紛紛寇盜何時靜龔遂登車是好音

蘭澧分岐望芷沅渡頭楊柳欲飛綿囊無惹草防私論
茶有茱萸敵瘴烟心定漸忘行役苦愁濃不覺歲時遷

從今暴珍為明誠曾見山頭火種田

武陵回首望巴陵擯退舟師就馬程
滴滴青溝穿路過峨峨蒼嶺送人行
廟堂任使誰能避箒麓猖狂只自驚
欲為伏波尋勝跡草間聞有鷓鴣聲

復用述懷韻寄吉甫師尹二公

物理盈虛豈易量更闌尋繹月侵牀
九年面壁師中夏三策回天黜異方
駑馬不離窠牧地輕鷗常占水雲鄉
誰能識得歸來趣古是今非夢一場

王仲通宰公自東吳別去十載甲寅秋會於鄂渚
乃知尚在七品常調中使人有鬱鬱遺才之歎談
論平生相對如夢歷數海內諸友離合升沉之狀
悲歡良久有不能自己者既而仲通有欲爲道隱
求奉一祠之語詰難未能服俄爲借騎下淮復歸
行館翌日綴詩二章奉呈蕪簡欽甫僉司士元使
君君平察推

拍手他鄉遇故知不妨卮酒話心期英豪意氣猶平日

政事機關勝昔時學悟素行那擇祿命當清苦只吟詩
操持到此真竒士不道今竒古亦竒

俯仰無慙是此公相逢如在夢魂中安仁客鬢垂垂老
工部行囊旋旋空擁篲無心迎相國還丹有意學仙翁
前賢好語休輕棄一命能施濟物功

南塘戲贈立齋主人

南塘幽閒似山林是是非非總不侵詩有淨功聯句好
坐無俗客話情深花枝徙倚閒居樂柳絮顛狂薄宦心

聞說主人村酒熟幾時携杖一相尋

秋夜聽雨

里巷歡傳現畢星中宵急雨換愁生
禦寒價索公孫被
送暑功調傅說羹
簷外濃陰滄海立
枕邊清響碧雲平
人間別有焦枯地
寄語天瓢莫盡傾

歲暮書懷錄贈謙甫提學暨子方學士昆仲

白髮蒼顏落照邊
敝裘羸馬惡風前
熏心醜醜凡三月
撲面緇塵又一年
世事升沉看木偶
天機消長閱韋編

投閒欲做耆英社何處花光似洛川

和平江推官佟亨甫遊錫山陸氏園亭

世途平地幾褒斜古道迂迴草棘遮
盈靜看天際月榮枯常擬檻前花
凌雲慷慨瞻新句好客殷勤喜故家
咫尺勝緣無分到爲誰辛苦趁蜂衙

漂陽道中寄金陵諸友

暮醉朝醒度浹旬清時人物上元春
席前雅調聲聲穩方外諧談字字新
六代興亡駒過隙十年離合鴈來賓

不堪回首東州路雲白山青一愴神

申仲禮自別秦淮臺憲諸公如失軒鑑繼過太原
僕留吳中嘗以詩奉寄丁酉冬敬甫薇郎回自并
門連奉報章且諗仲禮薰陶涵養非向年比英風
邁節形見乎辭又非行輩所可擬倫也因便奉和
略表仰思

滄溟塵劫谷為陵世事悠悠卒未平晚圃雲烟歸歎傲
春梁燕雀賀生成江東渭北三年別利路名場幾夢驚

吾道只今誰砥柱并州回首羨同盟

錢塘雜詠

客鬢刁騷色漸皤臣心澄澈淨無波詩書事業收功晚
鑿柄情懷觸諱多委吏深慙鞭笞手家人謾賦虞虬歌
悠悠窮達皆天定塵撲征衫奈俗何

上周宣慰

景行高名二十年披雲吳會覩青天士林碩果存生意
宦海清波被俗憐臘雪隨車消瘴癘仁風合道振魚鳶

漢廷求治新額面期與甌民共息肩

寄謝君舉副使

雙溪分被五周星吳下相逢眼更青
置酒樓頭觀世態放情言外慰山靈
惠留良藥詩脾悅想像纖絳暑氣醒
兩地宦遊非往昔晚風吹動雨冥冥

壽右揆性齋馬公

贊化調元四十春堂堂忠義自天真
文星一轉頌聲息教雨重霑生意新
虎節分榮清玉壘鶴書返政代蒲輪

閭閻後學無長技唯辦年年祝大椿

謝性齋右丞兼簡毛吉甫經歷

治安學術蚤蜚聲經濟襟懷老更成千載風雲應嘉會
兩朝編簡著清名去留泰嶽雲舒卷用舍周家鼎重輕
民物熙熙歸化育舊蹊桃李亦增榮

元貞丙申僑居村落與廣文廉君貞卿嘗聚首學
宮僕繼以金穀之職留吳中越二載君亦來臨愛
重之情不減於昔以是終日相忘而不遑請益新

涼入郊忽起黃鵠之辭詩以代餞

萬卷生涯濟世才十年淮浙兩書齋古今時變花經眼
南北人情酒放懷且托功名同敝屣終期膏澤到枯荄
阿儂似是轅中驥送客題詩欲悶排

呈平章梁公

螢光曾得近郎星柳絮俄成海上萍莞庫三年頭欲白
廟堂千仞眼終青區區刀筆猶南土望望簪纓盡北庭
偶向郵亭瞻使節斐章端欲訴飄零

贈吳道錄

風骨飄飄老地仙平生足跡踏雲烟
世緣擲去心無累俗客魔來道愈堅
詩調儘飛塵外語琴聲渾扣指中禪
夢魂不識三山景咫尺仙凡祇自憐

用前韻詠懷寄諸公

草堂寂寞帶春星守道常師魯兩生
去就失宜寧抱甕是非無定謗懲羹
傷心花鳥隨時變過眼軒裳掃地平
何日據床風露底悠悠懷抱爲君傾

送石抹同知

祖宗勲業耀京華，坦腹天朝宰相家。
播世文章鏗有韻，通天德業潤無瑕。
居官似友山中鹿，避俗如聞坎底蛙。
聞道柏臺飛薦剡，疲民翹首望星槎。

被差松江道中書所見

袞袞征帆望眼賒，古今聲利入長嗟。
遊商一歲千山路，薄宦三秋萬里家。
老我未爲卿月像，伴人同上客星槎。
孤鴻遠邁江南稻，慙愧鸞凰食竹花。

華亭道中連前詩寄盧知州王仲通朱文炳

茫茫廣斥望中迷地盡東吳土自泥寒氣襲人滄海近
濕雲當眼昊天低蕭條古樹旌茅屋詰曲清溝護稻畦
莫託鱸魚風味好月明聞鶴更悽悽

張安道提舉重臨江浙諸君喜而賦詩且以爲南
北生徒有所矜式之賀

聖朝辭令務宣通庠校橫陳比類宮不但函三遺字體
要將貞一變民風官師間出非無謂恩命重霑合至公

借逕早攄經濟策吾儕空老簿書叢

壬寅日長至兀坐不出寄盧敬齋知州

少年挑闔思冬至老境飄零怯歲闌梅友爲誰呈晚節
竹君空自傲清寒豪宗足食占雲易閭左無衣禱雪難
愁緒不妨添一線醉聞兒女勸加餐

贈會稽閒居官

蘭亭山水鑑湖天千載重逢陸地仙瀚海風波難把玩
歲寒松柏要持堅痒癢異衆非公論畝思君屬鉅賢

盛代名臣難屈指蒲輪應到海西偏

乙酉暮秋朔旦偶會陳蕙彥先生輔伯賢理問崔
鼎新太守孟子周僉司於汴梁客舍數分携之期
凡四十寒暑矣嗟歲月之遒邁思薄宦之徒勞驚
喜相對恍然如夢因述懷呈諸公

一別依稀四十年染園簪盍共凄然席間老眼無青白
身外虛名有後先故舊半爲泉下土音容渾是夢中天
相期努力加餐飯澗柏巖松老更堅

偶得數語留別諸名公錄贈伯宗學士子貞奉常
蚤歲踈庸老更癡都城留滯復何爲心同獻璞下和氏
命類償金直不疑謀醉惜無千日酒論交須定百年期
塞鴻慣識江南路頻附佳音慰別離

次賈公儼韻

三年淇幕奏廉聲一旦薇垣播令名慷慨不矜新制度
深沉祇守舊章程肯同柔蔓緣危壁閒看浮雲點太清
日向慈闈供菽水未饒仙侶住瑤京

餞王寶臣僉司赴行臺幕

丹詔相催賦遠行報公何必較途程
遨遊吳楚心田壯
歷覽江淮眼界清
雪擁名城迎使筆
雲封鍾阜待詩盟
佇看臺閣生風後
南北衣冠說姓名

用李公勉郎中留別韻敬送督後淮東

弱冠追隨鬢已蒼
雲萍南北爲誰忙
年將耳順交情重
事與心違別恨長
梁苑日晴烏反哺
楚天風冷鴈離行
萬間自古男兒事
好趁仙槎入帝鄉

時督蓋官
房并造舟

呈郝新齋左丞


繡斧澄清古范滂賜環三載鎮文昌稱停政事權衡穩
潤飾詩書意味長輔世昔聞心匪石憂民今見鬢成霜
何時不踏紅塵路閒侍新齋几研傍

晚登岳陽樓卽事

水閣樓高勢絕倫憑欄遙睇接朱垠翰林物色詩無敵
工部莊嚴筆有神一覽能清泉石慮千年不濯利名塵
殘陽欲下鄉關遠悵望西南懶問津

泊舟洞庭感興

洞庭青草暎斜暉黃帽停舟與願違
倏忽風雷無定在蒼茫天水欲疇依
白鷗浩蕩詩脾爽畫鷁漂搖酒力微
雋永簡齋冰雪句江南雖好不如歸



曹文貞公詩集卷五

欽定四庫全書

集部

曹文貞公詩集

卷六
後錄十五

詳校官中書臣羅錦森

侍讀臣孫球覆勘

總校官進士臣朱鈞

校對官助教臣胡予襄

謄錄監生臣朱上林

欽定四庫全書

曹文貞公詩集卷六

元 曹伯啓 撰

七言律詩

中丞敬公九日登真州南城以詩見示愛其閒逸
邁往之氣惜不得待行遂想像和呈二首

年華逝水故相臨
節序循環豈易禁
蘆葉汀洲遷客夢
菊花離落故園心
長筇曳曳風生袖
破帽翩翩雪滿簪

惆悵昔人行樂地
劇談豪飲莫沉吟

四事難并舉
世間登高今喜夾
河濱美哉陶令
杯中物
老矣長安陌上人
江限華夷晴浩渺
山磨今古暮嶙峋
醉歸應被兒童笑
猶有黃花在角巾

清明雨中登樓南望寄鑿江諸英俊

袞袞年華去
佳難悠悠今古獨
憑欄江山慣識
市朝變
桃李那禁風雨寒
旅食又驚三月到
閒情聊喜一家安
衰顏何物酬佳節
頻倒清尊強自寬

次黎景高僉事韻

黃鶴磯頭記往來好懷當此爲誰開
滔滔歲月情無奈望望金蘭首重回
欲傍東山耕別墅爲憐西日下荒臺
何時再到經行地同醉江湖蘸甲杯

題拱北樓

相君素有平南策吳會新成拱北樓
鼓角壯懷藩鎮肅軒窓豁眼海天秋
歲時玉帛修臣節政事金湯寫帝憂
民物熙熙無異議戎葵傾日水東流

和敬齋盧公仲通王宰新秋詠懷

殘編寂寞對韓檠四十年間一夢驚蒼狗白雲觀世態
碧梧金井聽商聲淵明未遂還鄉計工部空懷戀闕情
稚子不知時序改晚庭爭賀嫩涼生

張文在府教以詩示舉人因倚韻述懷

涵空白露嫩涼天角藝公堂結慶緣楚土產材供晉用
南方載籍勝西偏辭家已號青霄客釋褐纔爲陸地仙
座主無私眼如月寧教得失動諸賢

春晴承參政賈公招飲府治北亭

天涯景物亦暄妍
縱目危亭意豁然
花卉臨風香不斷
溪山過雨翠相連
杯行醪醕愁何在
兵弄潢池事可憐
只恐歸期春欲暮
夜郎西畔聽啼鵑

和孟子周僉司除夜見示

綠衣曾喜竹爐邊
回首光陰閱逝川
百慮無堪空白髮
一燈相續只青氈
老將佳節爲常事
人把閒官比舊年
想見來春風景好
奴星又繫送窮船

欲理歸舟而未能免輩噉噉作詩慰諭

鄉隣笑我賈胡留頻著書來說首丘縱有薄田堪養拙
還無小苑可消憂因循度日那知晚次第看花直到秋
坎止流行難固必家人休賦大刀頭

題伏波將軍廟

辰州

佐漢功臣矍鑠翁擇君不受子陽封椒房偶累雲臺像
蒼涼還傷銅柱功幸自生前識朱勃不妨牀下拜梁松
五溪未服星先隕文叔難比沛公

吳養浩求題文希伯竹坡詩卷

南州佳士樂中和手種篔簹綠滿坡老葉篩金風不止
新梢滴露夜如何渭川但說生涯好晉室偏招隱逸多
更約松梅作三益歲寒光景共婆娑

孟光壽日

七十神輿合整停歸來高枕夢初醒人情似減當時暖
山色還添近日青詩禮有功湔後慮兒孫無恙賴先靈
一尊對酌春將暮松竹當窓月在庭

次梁參政寄韓參議韻

金閨寂寂換柴關，汴水悠悠去不還。
遷客暫來真傳舍，微官聊喜近家山。
心除感慨成三樂，事不崎嶇得半閒。
仰藉大賢調變手，挽回清譽到人間。

冬至日白霄道中偶成錄寄朱叔茂郎中段惟德
魯子翬二都司仍希於張白高參議郭幹卿治書
與兩司幕長及按察郎中邢孟直諸公處以區區
薄况達之

榭葉蕭蕭朔吹寒山行病瘦怯衣單馳驅一帶灤江險
彷彿重經蜀道難旅邸僦床雖自愧繡衣持斧要同看
窮途恰值書雲節秫酒糠燈語夜闌

壽馬右丞

妙齡文采動朝端晚節襟期海宇寬西蜀東吳新雨露
柏臺蘭省舊衣冠名隨曙色千門肅辭播春風八座歡
行挈生民躋壽域洛陽重作畫圖看

古任臨流亭宴集寄謝座主冀需軒中丞兼簡張

克齋司農曾子貞郎中及席間諸友

兩脚黃塵閱幾州危亭俄喜見臨流
收功宰相能青眼
伺命郎官正黑頭
半醉聽歌評亥豕
諸任憐客鬪觥籌
片帆急送三千里
雲錦翻風想舊遊

次大同房壽卿教授與路幕賓董德基河東憲幕
富子輩等酬和詩韻

朝閱周襄暮宋襄悠悠王伯費論量浮生俛仰成千古
世路東西又十霜
目擊素絲翻色相
心隨紅腐勸脾囊

塞雲不隔征鴻路情緒無端繞故鄉

傲舍儀真詠懷寄郡賢四清先生子素彥英諸君
宦遊南北等飄蓬又作江城踏雪鴻淮濟片帆鄉國近
明良千載地天通願歸畎畝延殘歲閒閱羲娥轉太空
賴有儒官兼武弁時時相過一尊同

河徙封丘北尋故道所過廬里蕩然無遺壯木連
抱披蔽中流者強半泰定乙丑秋予自開封歸碭
山買舟神馬渡載書倒前領石而東湍瀑衝激神

魄駭動有不可形于言者因念年老親違歷此艱
險幸出坦途思警諸子遂述所懷寄衆友

桑顛榆蹶大河傾舟過陶波浪始平蓬影學遮冠蓋道
櫓聲如斥子孫名塞鴻已厭趨南北沙鳥誰知樂性情
想像故園松菊在爲誰漂泊尚勞生

威卿中丞溽暑中遣送秋露芳尊侑以佳篇感愧
之餘用韻以謝

盍簪江許話襟期平日紛傳始見知奕世清門膺重望

十年黃閣佐明時，休官未遜陶元亮。
戀闕猶思杜拾遺，野老盡消煩惱對。
花斟酒細哦詩。

敬公詩附於此

陰雨連朝未可期，病夫重腿每先知。
殘篇斷簡成癡計，叨用非材愧昔時。
學道安心元有法，息黥補劓果無遺。
山餅走送清秋露，可笑猖狂學詠詩。

中丞公疊示佳章，恬愉佚老情見乎辭。
如六日取蟾七年求艾之句，至切至當。
聊述鄙悰，發旅中一

粲

俗士馳驅挽不迴
高人嘉遯湛靈臺
身違巨浸千尋浪
心屬殘燈一寸灰
里巷幸容陪杖屨
朋儔何用話梯媒
清時會構凌雲厦
留取公輸簡衆材

想像中丞公
棄官高蹈之初心
難進易退之素志
復用前韻

知幾當日掛冠迴
長別薇垣與柏臺
痲疾在躬雖作楚
權謀轉首又成灰
鶴將野性難求友
蘭抱天馨不藉媒

人品百年無定論
急流勇退是英材

久雨不出呈中丞

一雨霖霖近浹旬
鸞花局促未成春
乾坤沴氣陰推物
江海風威冷襲人
老境倉皇思故國
長途沮洳怯洪津
我躬不閱憂閭左
盡刮飢膏買濕薪

老夫迫於簡書束裝就道
值層冰積雪阻舟淮甸
進止俱難乃荷昌齡士安
同志垂訪徒步泥塗三十
餘里曾不爲勞令人感激
不已別後聊寫薄况

寄二英彦希同德川宗姪洎知己者倚和見示以
慰寸懷

碌碌東淮已倦遊中臺飛檄又岐周曾聞雪擁藍關馬
今見冰凝邵伯舟自笑此身雖矍鑠却思何處不淹留
蓬窓欲養澄清志鵠面累累不斷頭

賀完顏仲遠承旨復領尚醫

弱冠從遊魯泮宮餘生都在別離中羨君日日清光近
愧我年年逆旅同壽國一如卿相職矻愚重立聖賢功

它時里社雞豚約齒德推先有鉅公

江陰詠懷

三年萍跡客神京一拜萱堂又此行
山色欲冥知雨信岸痕齊剝記潮生
鄉書不到腸堪斷海寇初聞夢亦驚
試上北城閒注目長江東去闕無聲

李御史王主簿迭相倡和用韻解嘲

騎鯨飛馬兩詩仙簪盞東吳豈偶然
天畔雲龍誰可比舟中李郭世爭憐
泰山丘垤忘高庠駸褭駸駘儘後先

一着輸君歸計早畏途何似日高眠

士貞教授弟寄詩句新意雅但不知鐵君故事云
何用韻述懷以答來意

自從萍梗任東西幾處飛鴻踏雪泥
三復無違人易老獨施有政物難齊
圖形麟閣身何濟想像菟裘首謬低
早晚世緣都淨盡至人相約話招提

白霄述懷寄都下諸友

暮景相尋百不堪鏡中衰髮雪盈簷
空囊盼盼月初五

孤枕摇摇更第三無術致身栖塞外有時隨夢到江南
斐章聊寄金蘭友唯恐咨嗟阻笑談

壽蘇顯卿郎中母夫人

世間七袞銜康寧天爲封君錫九齡綵服榮兼朝士服
郎星光近老人星母儀婦道追班史玉樹芝蘭奕謝庭
太華西瞻永無恙更期相對百年青

道過東昌申仲禮僉司暨狀元呼都克岱爾諸父台
輔賢昆仲厚意相邀別後以詩寄謝

十載重逢骨鯁臣生涯能斥向來貧一時輟棹抒情曲
三接乘驂到水濱烏府前循儀範古鴻臚首唱姓名新
清門幸喜陪清譙世路悠悠懶問津

西京趙良臣都事四十年之舊以詩見贈走筆述
和勉其歸家養疾不聽逮月餘遂卒官所

歸雲冉冉送年華鶴髮蕭蕭不到家已向九天雷雨露
好於平地樂烟霞緬思玄豹栖寒霧應笑黃蜂趁晚衙
畢竟世緣何日了林泉留客有茶瓜

次富子翬經歷見寄韻

識破人間義利關，迷途不遠便知還。
暫筭寄寓幕有餘裕，常對聖門無覓顏。
一自真才歸草澤，幾回幽夢度雲山。

堂堂事業薰涵久，文法支流指顧間。

來詩有政在癡迷薄頽間之句故云

挽劉損齋提舉

天都曾挹藻芹香，世故催人各異方。
頻托神游尋故友，遽爲鬼錄熱中腸。
衣冠屈指成蕭索，書疏論心付渺茫。
遐想九原無悔吝，傳家今有紫薇郎。

中丞公示詩隱然有確乎不拔之氣諷詠之餘再
賡高韻略攄愚衷但求免以哀暮賦歸後時爲耻

爾

茫茫宦轍苦縈迴流憩南州月滿臺世味已辭刀上蜜
人情潛傲管中灰洗杯細酌誰賓主得句長吟耻銜媒
食祿平生歸較晚鷓行回顧愧庸材

曹文貞公詩集卷六